

四庫全書

史部

欽定四庫全書

史部

皇朝文獻通考卷三十四

內閣中書_臣實汝翼覆勘

總校官中書_臣孫溶

欽定四庫全書

皇朝文獻通考卷三十四

市糴考三

糴

臣等謹按市糴相為表裏

國家法制精詳凡常平義社各倉已於本門首卷序述領要茲謹按年隸事如左至於另倉貯備或以山海僻遠藉應急需或以資鄰近協撥皆特行於

常法之外各省不必皆有有之亦無定額其稱名錯出見存多寡悉依各典冊所錄類著於篇

崇德元年

上命戶部承政英俄爾岱馬福塔傳諭曰米穀所以備食市糴所以流通有糧之家輒自收藏必待市價騰貴方肯出糴此何意耶今當各計爾等家口足用外有餘者即往市糴賣勿得仍前壅積致有穀貴之虞先令八家各出糧一百石詣市發賣以充民食

二年令固倫公主和碩公主和碩格格及官民富饒者凡有藏穀俱著發賣

六年定杜塞囤積并納粟之例都察院叅政祖可法等上言二事一杜塞囤積之弊有糧之家或賣或借俾得有無相濟賣則從市平糶借則從時起息不許坐擁多儲妄希長價一請開納粟之例或論罪之大小限以米數捐贖或無罪之平人有急公輸粟者量加獎錄因荒而用轉移之法遇饑而沛

權宜之令俟秋成豐稔即行停止得

旨所奏俱是我國人民偶值歉年著暫止估酒待豐年仍許沽賣獲罪之人無銀納贖願輸糧者准依時價算收有餘糧願助者量給獎賞願賣者許其自糶

順治四年以江西水旱發倉米三千餘石減價平糶從巡撫章于天請也

十一年令旌獎捐穀百姓

諭賑濟直隸大臣已哈納等曰近京地方米價騰貴饑民

得銀猶恐難於易米殷實之家有能捐穀麥或減價出糶以濟饑民者爾等酌量多寡先給好義匾額及羊酒幣帛以示旌表饑荒地方人民有往豐收處糶買米糧者不許恃強之徒過閉攔截犯者拿問情重叅處

又議常平義社各倉以積穀多寡定有司功罪時各府州縣俱有常平義社各倉責成各道員專管稽察舊積料理新儲應行事宜聽呈督撫具奏每年二次造冊報部部臣按積穀多寡分別議奏以

定該道功罪

十三年令各省修葺倉廩先是十二年將各州縣自理贖鍰春夏積銀秋冬積穀悉入常平倉備賑由布政司彙報督撫歲終冊送戶部如有假公濫私隱匿漏報者查叅其紳民樂輸者地方官多方鼓勵勿勒定數勿使胥吏侵剋及加耗滋弊至是令各省修葺倉廩并印烙倉斛選擇倉書糴糶平價不許別項動支

十七年定常平倉穀糴糴之法議定春夏出糴秋冬糴還平價生息務期便民如遇凶荒即按數給散災戶貧民并飭有司實力奉行俾沾實惠

康熙四年令山東地方官通糴以便民戶部議覆禮科給事中黏本盛奏言山東州縣禁糴以致衙役土棍借端詐害請令地方官通糴便民嚴禁蠹棍詐害應如所請從之

六年令甘肅將積貯米石變易新穀並禁地方官

借端擾民戶部議覆甘肅巡撫劉斗疏言積貯米石恐年久浥爛請變價另糴新穀以備賑濟得

旨依議但舊穀變價另糴新穀恐地方官借端擾民令該撫曉諭申飭如有此等情弊即行叅奏

七年陝西西安等四府積穀變價

詔停止生息戶部議准陝西巡撫賈漢復疏請將西安等四府積穀變價生息

上曰出陳易新原以為民若將利息報部反累百姓著停

止生息

十八年以江寧各屬報災借撥庫銀往湖廣糴米
平糶從巡撫慕天顏請也

十九年令常平義社各倉積穀永留各境內以備
賑濟先是十八年題准地方官整理常平倉每歲
秋成勸諭官紳士民捐輸米穀照例議敘鄉村立
社倉市鎮立義倉公舉本鄉敦重善良之人出陳
入新春月借貸秋收償還每石取息一斗歲底州

縣將數目呈詳上司報部儲穀多者管倉人給與頂帶有官吏掊克者照侵欺錢糧例處分強派抑勒借端擾民者罪之至是

諭戶部積穀原備境內凶荒若撥解外郡則未獲賑濟之利反受轉運之累人皆憚於從事必致捐助寥寥嗣後常平積穀留本州縣備賑義倉社倉積穀留本村鎮備賑永免協濟外郡以為樂輸者勸

以浙江杭州等府上年旱災恐米價騰貴

命動支庫銀四萬兩往湖廣江西糴米平糶建備米倉廩奉天等處城守征收雜稅令於米價賤時購貯

內府修造倉廩名曰備米遇有緊急以資撥用

二十年以福建旱災令於廣東浙江糴米平糶戶部議覆福建總督姚啟聖疏言福州等府夏秋亢旱米價日增請於廣東之潮州浙江之平陽買米平糶查海禁未開恐有不肖之徒借端販賣應不准行得

旨閩省被災准其赴潮州等處買米接濟如有借端通海者事覺將該督撫及押運官一併治罪

二十一年

命州縣衛所官員勸輸常平各倉米石定議敘之例奉

諭旨各省常平等倉積貯米數甚屬要務有此積貯倘遇年穀不豐彼地人民即大有裨益雖先經奉旨通行恐有名鮮實一遇水旱議賑之時未能接濟致民生艱困今將某省實心奉行某省奉行不力其逐一察議具奏

尋議令州縣衛所官員設法勸輸一年內勸輸米二千石以上者紀錄一次四千石以上者紀錄二次六千石以上者紀錄三次八千石以上者紀錄四次萬石以上者加一級如定有處分之例恐有畏罪過派苦累小民之弊是以未便預定從之

二十四年議山海關古北口張家口等處積貯米石以備蒙古饑荒令戶部官監視運送蓋造倉廩二十五年令黑龍江墨爾根蓋倉貯米

二十九年奉

諭直省官員實力勸輸常平義社各倉米穀

諭戶部朕念食為民天必蓋藏素裕而後水旱無虞曾經特頒諭旨著各地方大吏督率有司曉諭小民務令多積米糧其各省編設常平及義倉社倉勸諭捐輸米穀亦有旨允行其後復有旨見今某省實心奉行某省奉行不力著再行各該督撫確察具奏朕于積貯一事申飭不啻再三藉令所在官司能俱體朕心實有儲蓄何

至如直隸地方偶罹旱災輒為補苴之術嗣後直省總督巡撫及司道府州縣官員務宜恪遵屢次諭旨切實舉行俾家有餘糧倉庾充牣以副朕愛養生民至意如有仍前玩愒苟圖塞責漫無積貯者將該管官員及總督巡撫一併從重治罪

又令奉天錦州等處積貯米穀奉天錦州開元遼陽蓋州諸處應積蓄米穀議令將奉天錦州二府地丁錢糧每年存剩銀五千餘兩酌量米價賤時

陸續採買其部員所收牛馬稅銀三千餘兩交與倉官亦酌量買米收貯其倉內出陳易新交與奉天將軍管理并著

盛京戶部侍郎稽察收貯米穀每年仍將出入數目報部

又准山東紳衿士民捐糧備貯先是

上諭九卿曰足民之道宜裕蓋藏從來水旱靡常必豐年恒有積儲庶歟歲不憂饑饉如康熙二十七年頗稱歲

稔誠使民間經營樽節早為儲侍何至二十八年偶遇
旱浸室皆懸磬總因先時無備遂至餬口維艱比蠲除
正賦特發帑金分行賑濟被災之衆始獲安全今零雨
時降可望有秋惟恐愚民不知愛惜物力狼籍耗費祇
為目前之計罔圖來歲之需應行各督撫飭令及時積
貯度終歲所食常有餘儲用副朕軫念民依綢繆區畫
至意是秋山東豐熟正賦先蒙蠲免紳衿士民咸及時
樂輸巡撫以聞議准不論膏梁穀石每畝捐出三

合合省計得二十五萬餘石在各州縣適中大鄉之內各保殷實敦厚之人敬謹收貯以備荒年

止本

年舉行一次

三十年令直隸各州縣分別存貯米石議直省所捐米石大縣存五千石中縣存四千石小縣存三千石儻遇荒災即以此項散給其留倉餘剩者俱於每年三四月照市價平糶五月初旬將平糶價銀盡數解貯道庫九月初旬仍令各州縣買新穀

還倉嗣又令直屬捐穀每州縣再加貯一倍其捐
米內有高粱交春易紅令即糶賣買粟補倉以備
賑濟

令江寧京口等處官兵駐防之地各截留漕米十
萬石建倉存貯

三十一年

詔陝西省預備積貯米穀并令各省覈實積數申報
諭大學士等曰去歲陝西西安等處年穀不收罔有積貯

以致閭閻困苦已極已遣官賑濟之矣直隸所轄地方
素有儲蓄或州縣稍有不登即以所儲米穀從均贍給
是以民生獲濟良多今年豐歉尚未可知陝西省府州
縣見存米穀之數應行察明先行預備至各省府州縣
皆令積貯米穀數千石則裨益黎庶者大矣可下該督
撫等令各府州縣積貯米穀其所積數當逐一繕冊報
部

又以永平等處米價騰貴

詔發各莊屯米穀轉糶直隸巡撫郭世隆言永平所屬及
豐潤玉田等處去歲薄收米價騰貴奉天地方屢
登大有頗稱豐盈請令山海關監督許肩挑畜馱
者進關轉糶從之并

諭大學士等曰各皇莊及王等之莊屯所積米穀必多如無
伊主之言則莊屯何敢轉糶通州以東至山海關所有皇
莊及王等之莊屯米穀數目爾等與戶部會同內務府
總管并辦理王府事務官員等公同查明照時價轉糶

又以山西平陽府等處麥收價賤

命兵部右侍郎王惟珍往羅麥備貯

又

命有司勸諭捐輸

諭大學士等曰時屆麥秋令地方官勸諭百姓量力樂輸
委積貯待州縣將捐助者姓名與米數註冊秋成之後
亦倣此行焉其春時乏食者貸與之至秋照數收入以
為積蓄每年於麥穀告登後勸勉捐輸則數歲之間倉

廩充裕卽罹災祲民食自不虞匱乏矣

又

命轉運湖廣米石至西安平糶奉

諭旨聞西安米價仍貴流民還原籍者稀少朕為陝西地方民生常縈於懷聞自湖廣襄陽至陝西商州水路可達應將目下運到襄陽米二十萬石水路運至商州自商州運至西安照湖廣價值止加算所運腳費與之貿易則米價卽平於百姓大有裨益所得價賚至湖廣復

卷三十四
買米糧依法轉輸平糶俟陝西流民悉還本籍米價既賤之後方行停止

又令江西常平倉糶米易穀春間概行出陳秋成每米一石收買穀二石還倉

又議定各省常平倉俱照直隸分貯各州縣有陞遷事故離任者照正項錢糧交代有短少者以虧空論

又定山東等處捐穀例向例山東夏秋二季每畝

應捐米麥秋成後卽令易穀令併作一次每畝共捐穀四合除原有倉廩外其無倉廩之州縣地方官酌量修蓋加謹收貯時復令西安鳳翔二府照此例勸輸均貯福建濱海之地多收稻穀并令勸輸至明年復因浙省產麥無多亦令照山東捐輸之例擇地備貯選誠實紳耆管理耕種之時以一半聽民借貸限十月還倉

三十二年令商人買米至西安發糶以西安米價

尚貴

諭令戶部招募身家殷實富商給以正項錢糧並照驗文
據聽其於各省地方購買糧米運至西安發糶所
得利息聽商人自取之待西安米價平後但收所
給原銀

又發通倉米減價平糶并禁止順永保河四府蒸
造燒酒

諭大學士等今歲畿輔地方歉收米價騰貴通倉每月發

米萬石比時價減少糴賣止許貧民零糴數斗富賈不得多糴轉販又蒸造燒酒多費米穀著戶部速移咨該撫將順永保河四府屬蒸造燒酒嚴行禁止

三十三年令將山東運至

盛京之米於金州等處減價發賣先是以

盛京地方歛收令運山東省米石至三岔口以濟軍民至是侍郎阿喇彌言山東運來之糧由金州等處海岸經過請酌量截留減價發賣再遼陽秀岩

鳳凰城三處之人向來俱在牛莊買米亦應照金州等處將糧米截留行文各該管官令其到三岔河購置運去從之

又以霸州等州縣水災

詔發霸州文安等處貯倉米穀十萬餘石除散賑外皆減價平糶併截留山東漕米於景州等處發糶以平米價

諭大學士等曰據戶部查奏霸州等十州縣存貯米五萬

七千五百餘石穀八百石天津衛存貯米一萬石穀四萬四千一百餘石此米穀現在倉與否足以賑給與否若足用則以餘米平價糶與百姓可行與否山東漕糧截留數萬石平價糶賣則穀價不貴於民生大有裨益令輓至何州縣平價以糶應截留米若干萬石即遣戶部司官一員至巡撫郭世隆處令其逐一迅速詳議繕摺付伊賁奏直隸巡撫郭世隆等遵

旨會同戶部員外郎雍泰查霸州文安等州縣及天津衛

現在貯倉米穀共十萬餘石將此米賑濟霸州等處饑民需用三萬石所餘米穀應減價糶賣其景州等州縣將山東漕米截留平糶得

旨霸州等被水災地方所有積穀除散賑外餘著減價發糶其沿河一帶景州等各州縣衛所著將山東漕米每處截留二千石亦發糶以平米價復奉

諭旨恐不肖地方官員或增價發糶或糶與發賣之人以致百姓不沾實惠著巡撫郭世隆不時巡察

又以直隸賑濟餘米視時價減糶吏部右侍郎安布祿工部右侍郎常綬等遵

旨查直隸安州等十一州縣貧民十萬餘人應賑米四萬餘石

上諭大學士等曰朕思直隸米價騰貴小民艱苦若僅照數給米仍恐無益著將此米一半散給百姓一半照目前米價折銀給與貧民所餘之米著視時價減糶則百姓既得銀兩而糶米又易庶民沾實惠

以密雲順義附近地方米穀未收

命將轉運積貯之米每月發千石平價出糶遣戶部賢能
司官各一員監視

三十四年以

盛京亢旱

詔動支海運米二萬石以一萬石散給一萬石平糶副都
統齊蘭布等言今歲

盛京亢旱米價翔貴雖市有鬻粟窮兵力不能糶奉

諭旨令侍郎朱都納學士嵩祝等馳驛迅往會同盛京將軍副都統諸臣清察窮乏者於去歲海運米二萬石中動支一萬石散給令食可至秋成餘一萬石平價糶之兵民均有裨益如二萬石不足散給發糶其速以聞又運通倉米至密雲順義各一萬石貯倉備用癸巳

上駐蹕密雲縣

諭大學士等去歲朕見此處高粱結實者少糶者多米價

騰貴高粱一斗幾三百錢故將通倉米令運一萬石至此處五千石至順義縣減時價發糶米價稍平一斗百錢民以不困北地寒冷米穀多至失收今河水方盛著將通倉米運至密雲順義各一萬石令貯倉備用

又於霸州雄縣香河寶坻各發米一萬石減價平糶時直隸順天保定河間永平四府所屬地方水潦傷稼已將四府康熙三十五年地丁銀米全與蠲免其霸州雄縣香河寶坻四處皆有水道可以

轉輸每處發米一萬石各差司官一員責往照彼地時價減值發糶以資民食

三十五年令江南倉穀出陳易新先是三十四年議准江南積穀以七分存倉備賑以三分發糶至是議將江南舊穀於本年為始輪年挨次出陳易新其各屬糶三銀內酌提四萬石價銀解省俟秋成買穀為下年存七糶三之用

又發

盛京倉儲米穀五千石運至莫爾渾阿敦積貯以黑龍江吉林烏拉地方頻歲不登故也明年仍自天津運米至

盛京補完倉儲

三十六年令榆林等處衛堡積貯米穀

諭大學士等州縣已各諭其地方大小積貯米穀兵丁所駐沿邊衛堡亦屬緊要其榆林等處衛堡亦照州縣例將米穀積貯預備

又以山西米價騰貴令扈從船隻載米至保德

州平糶時

上親征噶爾丹駐蹕喀喇蘇巴克行在

諭大學士伊桑阿前山西巡撫倭倫以去歲山西數州縣
歉收今米價甚貴奏聞朕聞之中懷軫惻扈從大臣侍
衛官員執事人自船站坐來之船現有水手若至湖灘
河朔後將此船逆流牽挽回至寧夏甚難前曾諭總督
吳赫就此船將湖灘河朔積米或五千石或再加多量

行裝載交巡撫倭倫派賢能屬員轉運順流而下至保德州比時價減糶於民大有裨益著學士黃茂率同部院司官二員前往侍郎安布祿留此監發米石

命將湖廣三十五年分各官捐輸之穀貯各屬常平倉以備賑濟

三十七年截留山東河南漕糧於直隸沿河州縣積貯遣戶部司官二員於被水災沿河之保定霸州固安文安大成永清開州新安等州縣截留山

東河南漕糧每處運致一萬石積貯俟米價騰貴時平價糶賣

又定直隸四川貯穀變價并出借之例以直隸捐輸米麥高粱久貯倉中恐有汜爛令變價解貯道庫以備賑濟四川松潘等處積貯雜糧改為三分以二分存貯以一分遇糧貴時借給兵民將此穀按年出易周而復始永著為令

三十八年截留漕糧於江南高郵等處減價發糶

時淮揚所屬地方米價騰踊

命截留漕糧十萬石於高郵寶應興化泰州鹽城山陽江
都七州縣各留一萬石悉照時價減值發糶餘米
三萬石於邳州留八千石宿遷桃源清河安東四
縣各留五千五百石亦照時價減糶又截留米十
萬石於揚州淮安各收貯五萬石

四十年截留湖廣漕糧存貯江寧省倉議定楚省
漕糧二十萬九千餘石盡數截留存於江寧省倉

以六萬四千石充給兵食將採買兵米價值照數
扣留以四萬五千石分發淮安等處平糶以濟民
食秋成後將所糶之價并兵米扣留價值買補歸
倉其餘存剩米石仍俟下年給兵發糶

四十一年令直隸山東山西陝西河南江北預備
倉儲奉

諭旨阜民之道期於有備去冬北地少雪今春雨澤尚未
霑足誠恐蝗蝻易生有傷農事亟宜先時預防直隸山

東山西陝西河南江北地方歷年積貯倉糧果否足額該督撫確加稽覈務使倉有餘儲不致匱乏其一切應行預備事宜須悉心講求料理以紓朕宵旰勤民之意四十二年截留漕米二萬石運至濟寧州兗州府等處州縣減價平糶

又令陝甘積貯倉穀是年陝省年穀豐收奉

諭旨山陝不通水路若稍遇災卽至艱窘今值糧米充裕之時無有急於各地方積貯者令督撫等將預備之處

盡心究議嗣議定陝西人口衆多之州縣貯米三千石
次二千石又次一千石交與地方官採買存貯動
西安司庫兵餉銀十四萬兩以十萬兩照時價買
米以四萬兩蓋造倉廩甘屬既無倉廩應動常平
倉糧內十分之一蓋造將此項用過糧石照數填
還再陝甘二處照依應徵地丁銀一錢米一斗者
令捐輸糧三合以為備災之用歉歲停捐

令直隸立社倉時直屬各州縣雖設有常平倉收

貯米穀遇饑荒之年間或不敷賑濟

諭於各村莊設立社倉以備饑荒如直隸設立社倉果有
益於民生各省亦照此例嗣廷臣等議定社倉之穀於
本鄉捐出即貯本鄉令誠實之人經管上歲加謹
收貯中歲糶借易新下歲量口發賑嗣於三年內
直屬勸捐米穀共七萬四千九百七十石有奇出
借窮民得息米一千五十一石有奇又四十四年
永保二府陸續捐穀四百三十五石有奇巡撫以

聞議准俱令於各屬社倉存貯

四十三年以京城米貴

命每月發通倉米三萬石運至五城平糶

又議定州縣官霉爛倉穀處分州縣倉穀霉爛者督撫
題叅革職留任限一年賠補賠完免罪復職逾年不完解任二年
外不完定罪著落家產追賠補完之日令府道出具印結申繳藩司
督撫存案以杜扶捏之弊如再有虧空府道亦分別議處

又

命截留漕米二萬石收貯河間沙河橋地方以備平糶

又以山東歉收

命從江南買穀運往收貯

又議定各省倉穀存留發糶數目定例各省積貯米穀大州縣一萬石中八千石小六千石其餘按時價易銀解存藩庫具存倉米穀每年以三分之一出陳易新至是又議准直隸各屬現存米穀無多令照舊收貯值歉年詳明題請發糶山東大州縣

貯穀二萬石中州縣萬六千石小州縣萬二千石
山西之民別無他業惟資田畝積貯穀少一時購
買維艱令大州縣存穀二萬石中一萬六千石小
一萬二千石江西州縣大者止存穀一萬二千石
暫停糶三江蘇所屬令大州縣貯穀五千石中四
千石小三千石其江寧倉捐米八萬七千餘石久
貯恐致浥爛照常平倉每年糶三秋成買補四川
人民稀少大州縣貯穀六千石中四千石小二千

石無庸糶三廣東常平倉米穀照例存貯多餘易銀按遠近分貯司庫府庫遇有荒年將庫貯銀兩遣官赴鄰省採買運至被災之處照時價糶賣至存倉米穀照例出易惟潮郡僻處山陬或遇荒歉米價騰踊令存貯穀四萬八千七百餘石以備不虞雲南糶三銀兩令州縣官就近解存俟秋領銀買補河南現存穀石每年將一半留倉備賑一半借給窮民福建現在捐輸穀二十七萬餘石常平

倉穀約五十六萬餘石其內地積穀仍按原存州縣之額數存留其常平穀照依時價盡數發糶至臺灣一府三縣孤懸海外現在捐穀八千六百餘石常平倉穀一十一萬餘石除每縣應存穀石其餘盡糶貯銀遇荒賑濟所存穀石仍照例出易而臺灣鳳山諸羅三縣共存粟米七十餘萬石為數既多積貯日久令留二十萬石為臺郡預貯三年兵需其餘一概變銀收貯府庫即充本地兵餉

盛京地方與各省不同無庸分別大小定數其九州縣積貯米糧多寡不等自四十三年起將現在數多之寧遠州錦州應徵米豆改徵銀兩解交數少之承德七州縣買糧蓋倉以資積貯貴州各府州縣常平倉現貯米一千二百餘石稻蕎麥共一十八萬餘石內惟貴安等地方俱係衝要且官兵駐劄自宜多貯貴陽府存貯稻一萬一千餘石貴筑縣存貯稻一萬四千餘石安順府存貯稻八千石

其餘各府屬有六千石及三四五千石不等俱不足大中小州縣應存之數俟捐貯贏餘之日再請
雜賣

又

命自明歲正月為始於京師及通州地方發倉米照本年
例平糶

四十四年議令河南各屬建倉積穀以河南府居
數省之中宜積穀以備賑濟山陝之需議令將四

十三年漕米每米一石易穀二石共穀四十六萬
五千六百八十二石於河南府收貯穀二十三萬
五千六百八十二石造倉廩二百九十三間貯之
其餘二十三萬石於近汴近洛之祥符貯三萬石
中牟貯二萬五千石汜水貯二萬石鞏縣貯二萬
五千石澠池貯二萬石偃師貯二萬八千石陝州
貯二萬七千石靈寶貯二萬八千石閿鄉貯二萬
七千石共造倉廩三百六十四間加謹收貯每年

青黃不接之時出陳易新照依三分之一借給農民秋後還倉

四十六年以江蘇旱災動支藩庫銀至湖廣買米平糶從巡撫于準請也

四十七年以江南米貴截留湖廣江西漕米四十萬石分撥江寧蘇州松江常州鎮江揚州六府減價平糶

又令福建採買米穀存貯以福建去歲被災各處

商販稀少米價漸昂借藩庫銀於他省採買存貯
備賑

又以江蘇久雨米貴令各州縣將截留分貯米石
平糶并

勅各省督撫聽商人販米出境

又定州縣官經理倉穀議敘議處之例議定州縣
官於額貯積穀之外買穀貯倉照盤查贏餘例准
其議敘或捐穀本倉以少報多或將現貯之米捏

作捐輸以邀議敘後遇本官任內有虧空事發除
知府分賠外原報之督撫一併議處至職官將倉
穀私借與民計贓以監守自盜論所少穀石著落
追賠

又截留漕糧於江浙被災各州縣減價平糶江蘇
截留十萬石安徽截留五萬石浙江杭嘉湖三府
截留八萬石俱令減價平糶價銀貯庫於來歲收
獲後買米還項

四十八年

命江浙二省有司勸諭紳民於秋收時遵行捐輸之法

又以江浙米價騰貴清查收買囤積之弊時湖廣江西稻穀豐收沿江販米甚多而江浙米價愈貴緣富豪之家廣收囤積於中取利

勅廷臣詳議尋議應檄各該督撫選委廉能官員凡有名馬頭令其嚴行察訪如有富豪人等將市米囤積者即令在囤積之處照時價發糶違者以光棍例

治罪其有販米私出外洋者令沿途文武官弁嚴查禁止使湖廣江西販買之米俱入江南浙江地方則米價自平

上諭大學士等曰如照爾等所議則胥役借此稽察徒滋需索而已朕意以為必於本源之地清查自無收買囤積之弊湖廣江西之米或江浙富商或土著人民某人於某處買米石若干清查甚易應行文湖廣江西督撫委賢能官將有名馬頭大鎮店買賣人名姓及米數一

併查明每月終一次奏聞併將奏聞之數即移知浙江
督撫湖廣江西之米不往售於江浙更將何往此米衆
所共知則買與賣不待申令而米之至者多即大有利
於民也

四十九年議陝甘存貯米石發糶陝甘存貯米石
已歷年久恐有浥爛議定糧貴之年存五糶五糧
賤之年存七糶三

又令湖南鎮筵地方積貯平糶湖南鎮筵地方自

改協為鎮之後兵民聚處生齒日繁至是署巡撫
王度昭言請酌借帑銀三千兩買穀貯倉穀貴之
時平價發糶秋成穀賤之時買補還倉預備賑濟
每年將餘剩價銀於六年之內補還所借之項從
之嗣戶部議定將買貯穀石責令鳳凰營通判專
管辰沅靖道魚轄年終盤查出結如有虧空那移
道員照知府例通判照知縣例議處

准浙江開例捐監定額貯倉先是江南開例捐監

定額貯倉捐足奏明停止至是浙江巡撫黃秉忠
言江浙二省財賦之地人民繁庶止於江省開捐
則湖廣江西之米俱聚集江南而浙省捐納之人
亦必將米運赴江南浙米勢必騰貴民食愈艱請
亦照江南捐監例各府議定貯倉米穀額數捐足
即行停止從之

五十一年議准山東省分貯捐穀大縣一萬石
小縣八千石仍於沿河等處酌留數十萬石以備

鄰省撥運

五十二年

詔發米一萬石於京城減價平糶

又

命都察院左都御史趙申喬往廣東發常平倉穀平糶廣
東米價騰貴發常平倉穀三十萬石平價糶賣交
與趙申喬等前往辦理尋奉

諭旨俟八九月北風起時從江浙兩省撥米二十萬石用

水師營戰船裝載由海運往若廣東豐收將此運至米

石一半存貯粵省一半分運閩省備賑

嗣以浙省歉收十萬石俱留備

本省之用撥江南米五萬石運至福建五萬石運至廣東到日即行平糶

又飭江西省嚴查出糶倉穀江西巡撫佟國勳言
入夏以來米價漸長小民籲請發粟臣已將所貯
倉穀令有司糶賣俟秋後買補還倉

上諭大學士等曰去年江西省年穀甚熟或因地方官虧
空倉穀借此抵銷亦未可定著戶部詳議具奏尋議佟

國勦題報發糶倉穀原疏內並未聲明係何州縣及所糶倉穀若干應行令該撫嚴查其現在糶穀州縣中有浥爛虧空借此開除等弊即著指名題參從之

五十四年以密雲古北口關隘要地各運米石存貯

又議定直省社倉勸輸之例凡富民能捐穀五石者免本身一年雜項差徭多捐一二倍者照數按

年遞免紳衿能捐穀四十石令州縣給匾捐六十石知府給匾捐八十石本道給匾捐二百石督撫給匾其富民好義比紳衿多捐二十石者亦照紳衿例次第給匾捐至二百五十石咨部給以頂帶榮身凡給匾民家永免差役

五十五年發熱河倉米減價糶賣時

上駐蹕熱河

諭領侍衛內大臣等聞熱河米價甚貴每石至一兩七錢

扈從人等復行齊集採買則米價愈加騰貴官兵每月
既得錢糧若復給口糧未免重複但以所給錢糧買米
又恐不敷著將熱河之倉及唐三營倉所貯之米發出
設立一廠每石定價銀一兩賣與隨駕官兵令各該管
之人查視不許多買自無轉賣之弊而於官兵亦大有
裨益矣

又暫開山海關米禁戶部議覆直隸巡撫趙宏燮
疏言永平府屬艱食臣聞得山海關外米穀頗多

向因奉禁不敢入關請暫開兩月之禁俾關外之民以穀易銀益見饒裕關內之民以銀易粟得賴資生應如所請從之

又以京師米貴發米三萬石減價平糶

又飭查河南山東商賈販賣麥穀數目禁止囤積大學士九卿等遵

旨議定河南山東與京師甚近兼之連年豐收乃京師麥價未見甚減者皆由商賈富戶等預行收買所致

應行文河南山東巡撫查明由水路北來買與商
賈麥穀數目每月繕摺奏聞仍行文直隸巡撫凡
本處商賈及沿途富戶有多買者俱嚴行禁止從
之

五十六年發通倉積米分運直隸各府州縣存貯
平糶

五十七年禁湖南暹羅廣東廣西總督楊琳疏言
粵東之米資藉粵西粵西之米又資藉湖南湖南

販米至粵必由永州府經過彼地奸民每借禁糶名色攔阻勒索商販不前請令湖南督撫如有奸民阻截取利者行令該地方官查拿治罪從之
五十九年於河南截留漕米內撥十萬石運至西安存貯

六十年以京師米貴發京通倉米石并內務府莊頭穀石減價平糶

以陝西歲歉撥運河南米石平糶再撥河南湖廣

米各十萬石運往存貯備用是時陝西歉收

上念陝省富戶積藏米石甚多復發內庫銀五十萬兩令
左都御史朱軾光祿寺卿盧詢往陝省勸諭富戶
照時價糶賣米石

議令直省督撫嚴查各州縣現在存倉米石

諭大學士等曰古人云三年耕則有一年之蓄九年耕則
有三年之蓄言雖可聽行之不易如設立社倉原屬良
法但從前李光地張伯行曾經舉行終無成效至於各

省積貯穀石雖俱報稱數千百萬實在存倉者無幾即
出陳易新之法亦不為不善第春間僅有所出秋後並
無所入州縣官侵蝕入已急則以折銀掩飾此等積弊
朕知之甚詳其報荒之真偽虛實朕亦無不洞悉如熱
河所積穀石每年減價平糴秋收糴補還倉數目無多
稽查頗易所以每有餘糧爾等會同詳議具奏於是議
定各省州縣現在存倉米麥穀石令該督撫嚴查
如有虧空勒限補足

又令直隸山東河南山西四省將常平倉穀平價糶賣直隸山東河南山西陝西被旱除陝西已差大臣賑濟外現查常平倉米穀直隸一百六十萬五千二百七十石零山東四百七十三萬石零河南一百三十四萬七千石零山西四十八萬二百石零令四省巡撫遣官分賑并平價糶賣

又令浙江運米三萬石至福建廈門收貯以福建地方需米孔殷

勅浙江巡撫提督於乍浦地方嚴禁私買不許出海動帑
買米三萬石預備海船裝載派官兵護送押運從
海運至廈門收貯其福建販賣米石不必禁止
又以山西建立社倉經奉差山西左都御史朱軾
疏請晉省建立社倉用備荒歉奉

諭旨建立社倉之事李光地任巡撫時曾經具奏朕諭以
言易而行難爾可姑試李光地行之數年並無成效民
多怨言張伯行亦奏稱社倉頗有裨益朕令伊行於永

平地方其果有成效裨民之處至今未奏且社倉有益無益朕久已留心採訪凡建立社倉務須選擇地方敦實之人董率其事此人並非官吏無權無役所借出之米欲還補時遣何人催納即豐收之年不肯還補亦無可如何若遇歉收更誰還補耶其初將衆人米穀扣出收貯無人看守及米石缺空之時勢必令司其事者賠償是空將衆人之米棄於無用而司事者無故為人破產賠償矣社倉之設始於朱子其言具載文集此法僅

可行於小邑鄉村若奏為定例屬於官吏施行於民無益今朱軾以建立社倉具奏此事不必令他人辦理即令伊久住山西鼓勵試行

六十一年

諭戶部趙宏燮奏將收貯正定順德各州縣四萬石米平糴其餘各州縣有米貴之處亦將倉米平糴十分之三俱俟秋收後買補還項等語去年各州縣收貯莊頭等所交米石部內曾遣司官會同地方官糴賣其糴米銀

兩至今尚未完繳據此各州縣收貯倉米俱無實際平
日積貯原為備荒而設今值青黃不接之時固應平糶
但地方官虧空倉米即借此掩飾虧空究竟倉米既虧
百姓從何糴買於民生並無裨益也現在存倉米穀如
果足數即照該督所請糴賣倘朕遣大臣查看時州縣
並無米穀藜庶不得糴買將州縣官即行正法該管上
司從重治罪

皇朝文獻通考卷三十四

欽定四庫全書

皇朝文獻通考卷三十五

市糴考

四

糴

雍正元年飭直省督撫查核存倉米石刑部尚書
勵廷儀言各省存倉米石雖有司道知府盤查不
能保其一無徇私當責之督撫嚴加核實造冊具
奏督撫離任將冊籍交代新任限三個月查核奏

聞如有虧空即行題叅徇庇者議處仍令分賠從之

又動支浙江庫帑買米三萬石運至福建分貯廈門收貯一萬石泉漳二府各貯六千石其餘八千石運赴福州遇米價稍貴奏請平糶

又以河北三府艱於粒食議令截留漕米六萬二千五百九十石於衛輝府倉存貯撥運陝州收捐米二萬石於懷慶府倉存貯備用

又

諭河南巡撫石文焯河南居四方之中地廣民庶素封之家常喜儲藏米穀以收居奇之利比年連遇荒歉民食維艱特遣官往賑該撫即豫為籌畫俾富室之粟皆得流通出糴於官以為賑恤之用

又以採買備賑米石

敕有司毋得阻遏商販時以北省二麥歉收差員到南省採買米石以備賑貸平糶

上聞各省地方官有因差員買米禁止商販不許出境者
特諭以浙江及江南蘇松等府皆仰食於湖廣江西令該
部速即行文各省凡有米商出境任便放行毋得阻撓
二年以江浙沿海地方海潮泛溢令湖廣江西河
南山東安徽各省動帑買米運往平糶湖廣買米
十萬石江西買米六萬石運交浙江巡撫平糶河
南買米四萬石山東買米六萬石安徽買米五萬
石運交蘇州巡撫平糶

又議定社倉事例先是奉

諭湖廣總督楊宗仁湖北巡撫納齊喀湖南巡撫魏廷珍等國家設立常平諸倉蓄穀積粟偶遇旱澇詳報踏勘往返察驗未免後時古人云備荒之倉莫便於近民而近民則莫便於社倉前諭爾等勸導建設蓋專為安民起見也爾等自應轉諭屬員體訪各邑士民中有急公尚義之心者使主其事果掌管得人出納無弊行之日久穀數自增至於勸捐之時須俟年歲豐熟輸將之數

宜隨民力多寡利息從輕取償從緩如值連年歉收即予展限令至豐歲完納一切條約有司毋得干預至行有成效積穀漸多該督撫亦祇可具摺奏聞不宜造冊題報使社倉頓成官倉貽後日官民之累朕初意如此孰料該督撫欲速不達令各州縣應輸正賦一兩者加納社倉穀一石且以貯穀之多少定收令之殿最近聞楚省穀石現價四五錢不等是何異於一兩正賦外加收四五錢火耗耶是為裕國乎抑為安民乎諭到該督

撫速會同司道府等官確商妥議務得安民經久之法以副朕意嗣復奉

諭旨社倉之設原以備荒歉不時之需然往往行之不善致滋煩擾朕以為奉行之道宜緩不宜急宜勸諭百姓聽其自為之而不當以官法繩之也是在有司善為倡導於前留心稽核於後使地方有社倉之益而無社倉之害爾督撫當加意體察至是議定社倉之法一令地方官開誠勸諭不得苛派米石暫於公所寺院收

存俟息米已多建厰收貯所捐之數立冊登明不
拘升斗積少成多若有奉公樂善捐至十石以上
給以花紅三十石以上獎以匾額五十石以上遞
加獎勵有年久不倦捐至三四百石給以八品頂
帶每社設正副社長擇立品端方家道殷實者二
人果能出納有法鄉里推服按年給獎十年無過
亦題請給以八品頂帶徇私者即行革懲侵蝕者
按律治罪其收息之法凡借本穀一石冬間收息

二斗小歛減半大歛全免祇收本穀至十年後息

倍於本祇以加一行息

乾隆三年議定每息穀十升以七升歸倉以三升給

社長作修倉折耗

其出入之斗斛遵照部頒公平較量社

長預於四月上旬申報給貸定期支散十月上旬

申報受納不得抑勒多收臨放時願借者先報社

長計口給發交納時社長先行示期依限完納其

冊籍之登記每社設用印官簿二本一社長收執

一繳州縣存查登載數目毋得互異其存州縣一

本夏則五月申繳至秋領出冬則十月申繳至來
春領出不許遲延以滋弊竇每次事畢社長本縣
各將總數申報上司凡州縣官止聽稽查不許干
預出納如有抑勒那借强行糶賣侵蝕等事許社
長呈告據實題叅再各方風土不同更當隨宜立
約為永遠可行之計令各督撫於一省之中先行
數州縣俟一二年後著有成效然後廣行其法於
通省

三年定各省存倉米麥改易稻穀之制時議南方
諸省土脈潮濕米易霉爛不若稻穀可以耐久因
定嗣後江安閩浙湖廣江西川廣雲貴各省存倉
米一石改換稻穀二石加謹收貯需用之時碾舊
貯新除安徽但有稻穀則無貯米及浙江福建倉
米有限無庸改易

嗣於十一年議准安徽鳳陽亳
州等處凡產粟穀之處每逢糶

三即准其買粟
補倉換年易換

其江西湖北湖南四川四省存貯

米皆在五萬石內外令於一年內改易稻穀

內惟
四川

茂州易蕎麥六百石松潘衛存貯軍需米旬
作兩年平糶仍買新米貯倉五年更換一次江淮

截漕米廣東存倉米皆八萬餘石廣西存倉米十
萬餘石分作二年改易稻穀雲南米五十七萬餘
石貴州米四十萬餘石一二年內不能盡易每年
雲南應給兵糧十四萬九千六百餘石貴州兵糧
九萬五千六百餘石即將二省存倉之米支給至
秋成時於額徵內收穀補項雲南存倉米限四年
貴州限三年盡可改易稻穀嗣後各省易穀既完

每年額徵兵餉仍收米給兵餘悉改徵稻穀而山西河南亦令將存倉米麥照例糶賣易穀其民欠及虧空米糧亦令改折追補入倉至蘆子蕎麥等各處出產不同并飭令各屬確訪時價易穀入倉又以黔省地氣潮濕倉米易致霉爛嗣後將兵米合計共存三年之蓄餘者於青黃不接之時量行減價平糶以濟民食著為定例從總督高其倬請也

又

諭戶部歸化城土默特地方年來五穀豐登米價甚賤查
黃河自陝西黃甫川界入口河之兩岸一屬山西一屬
陝西應自歸化城購買米石從黃甫川界黃河運至內
地到土拉庫處修建倉廩收貯其歸化城大青山黃河
岸口亦建一倉買米存貯

又以米價騰貴

諭倉場總督將舊貯米石減價平糶并行文直隸總督凡

近水州縣可通舟楫者俱令赴通倉領運平糶便民

又以各省秋成豐稔

命督撫等遵行社倉之法并及时買補州縣倉儲

又定雲南社倉題報穀數之例從雲南巡撫楊名時請也自雍正二年為始貯穀實數於次年歲終具題俾每年捐輸里民借支以及有無發賑均得稽核

又議准社倉事宜五事江蘇巡撫何天培條奏一
社倉借貸散賑預造排門細冊存案凡不務農業
遊手好閑之人不許借給一正副社長外再公舉
一身家殷實之人總司其事一州縣官不許干預
出納如有抑勒那借許社長據實陳告一所需紙
張筆墨須勸募樂輸或官撥罰項充用不得科斂
擾累一積穀既多恐滋浥爛應於夏秋之交減價
平糴秋收後照時價買補俱從之

是年湖廣江南浙江秋成豐稔

命湖廣動支庫銀十萬兩採買米石於省倉及各州縣加
謹收貯如民間米價少昂即行停止江南浙江一
面動項採買一面定數具報

又令直省倉糧出陳易新之時佐貳官公同收放
如州縣私自糶賣佐貳官扶同隱匿者罪之

又定山西常平倉積貯事宜提督山西學政右庶
子劉於義言山右當豐亨之時宜預籌積貯每年

發銀四萬兩交太原平陽潞安大同四府建倉積
貯以備各州縣需用選擇廉幹官董其事如能實
心經理三年准予議敘有挪移虧空嚴加處分每
歲於青黃不接時出糶秋收時買補小歛平糶中
歛出借大歛賑濟務定章程以垂永久下該撫實
力行之

四年令兩淮建鹽義倉兩淮商衆公捐銀二十四
萬兩又巡鹽御史噶爾泰奏繳公務銀八萬兩共

銀三十二萬兩奉

旨將二萬兩賞給噶爾泰其三十萬兩為江南買貯米穀
蓋建倉廩之用所蓋倉廩賜名鹽義即著噶爾泰交與
商人經理

又奉

諭旨各倉減價平糶原期有益貧民聞清河本裕倉奸胥
猾吏串通富戶賤買貴賣本倉賣完又賣別倉甚屬可
惡倉場侍郎等所司何事向後若再有此弊定將監糶

米石之員正法倉場侍郎嚴加治罪

又發通倉米二萬五千石運至保定平糶從直隸
總督蔡珽請也

又議定州縣侵蝕那移浥爛倉穀之罪先是三
年

諭內閣九卿曰積貯倉穀關係民生最為緊要朕屢降諭
旨令該督撫等嚴飭州縣及時買補虧欠之數無如苟
且遲延奉行不力昨據月選官陳克復條奏虧空倉穀

請支動正項買補一面嚴追本官還項朕已交與九卿議行令直省地方俱著定限三年將一應倉穀買補完足不得顆粒虧欠三年後朕必特差官員前往盤查如有缺項從重治罪倘有不能補足情由著該督撫題奏凡虧空錢糧猶可立限追完無損國帑若虧空倉穀則一時旱澇無備事關民瘼其罪較甚自宜嚴加處分並著九卿確議定例具奏向例虧空倉穀處分止於革職留任限年賠補至是遵

旨議定穀一石比照錢糧一兩科斷侵蝕一千石以下擬
斬准徒五年一千石以上擬斬監候不准赦免所
侵欺穀石仍著嚴追完項其那移者數止千百石
擬徒五千石以上者流一萬石以上者充軍二萬
石以上者擬斬限一年內全完免罪二年內追完
減二等三年內追完減一等限滿不完照數治罪
其實霉爛數止三千石以下者革職留任限年賠
補三千石以上者即以那移論疏上

諭曰凡倉穀霉爛皆由倉廩不修以致倒塌滲漏虧折米穀此愈當加懲者今若寬其處分則有司平日必不加意修理以便借辭此處著再議於是議令地方官將滲漏不堅全之處需費無多者即時補葺有年久毀爛倒塌者動項修蓋有將倉糧寄貯及露囤者題請添設倉廩嗣後州縣怠玩不修理蓋造以致米穀霉爛者革職勒限賠完限內不完即照侵蝕例按數科律遇赦不宥從之

又令山陝各府屬買穀分貯議令山西動帑金四萬兩買穀分貯太平潞大四府各州縣其素無蓄積并向來積貯不多之處務令購足五年之內每年准動四萬兩照數買貯責令知府直隸州盤察有力行三年盡善者保題叙功陝西動帑金十二萬兩及本年豐收採買穀石存貯涼州臨洮鞏昌甘州寧夏各府屬以備撥用

又令五城設廠平糶以京城米價騰貴

特諭發倉米五萬石分給五城平糶俟市價平減即行停止所存剩米即貯該城為將來之用又以五城米廠並在外城城內糶買維艱復

諭於內城設廠數處以便窮民

又令州縣多設廠平糶并嚴捏借之弊戶部覆准御史馮長發奏凡州縣平糶應多設廠以便附近居民赴糶其有奸商豪戶囤積射利者訪拿治罪平糶穀石每石准銷一二升以抵耗折有攬和灰

沙者題叅至借給與民之穀倘吏役捏名虛領秋
時追欠無著從重治罪所欠米穀於該州縣名下
追還并照失察例治罪其有官役侵剋者該督撫
察出題叅

又令福建廣東貯備米穀時

上以福建廣東二省地處極邊應作何貯備米穀令九卿
集議因議定閩省則臺灣常運平糶米五萬石之
外動正項錢糧運米十萬石存邊海地方備貯若

遇臺灣豐年酌量加運廣東則通省府州縣存貯數
多者開倉平糶即將價銀交數少之州縣買貯再將
廣西捐穀糶三價值仍令採買穀石運交廣東分貯
又令江南淮安等處採運麥石至閩省平糶浙閩
總督高其倬言閩省米價騰貴現撥溫台二府倉
穀七萬石運往接濟更請於江南淮安等處採買
二麥運閩平糶從之

又清釐直隸各屬借糶倉穀之弊先是直隸總督

李紱請將倉糧糶借與民有

旨命翰林御史等官會同地方官核實監糶務使小民均沾實惠其倉糧果否實貯一并查驗至是奉

諭旨據鄂爾奇繆元奏稱直隸借糶倉穀弊端種種無非地方官巧為掩飾虧空之計向來直隸倉穀虧缺甚多朕知之甚悉各官惟恐敗露故設計彌縫詳請借糶李紱為其所欺遂代為題請且未經奉旨即先為散給及派員往查又轉停止覽鄂爾奇等所奏各官情弊顯然

凡此等州縣官若仍留原任將來假公濟私那新掩舊必至剝削小民虧欠正項而地方倉廩始終不得清楚可將巧稱倉穀出借各官悉行解任借出之穀俱著解任之員自行催還以一年為限逾限不還者治以那移虧空之罪

又運穀至福建積貯先是奉

旨令江西運米十五萬石往閩濟用至是大學士等議請再截留浙江漕糧十萬石易穀二十萬石就近運

往從之

又

命山東巡撫動用帑銀於青登萊三府購買米石運至濟南三府分貯

又令廣東各營建倉貯穀議定廣東邊海之南澳鎮石營澄海二門達濠等營貯穀五千二百石潮州鎮標三營惠來平海大鵬等營貯穀六千二百石提標五營貯穀五千石督標并水師六營肇慶

城守營共貯穀七千石計每兵一名存穀一石以備
借貸秋收免息徵還

又奉

諭旨江南秋雨稍多被水州縣已令確查賑恤入冬以後
積水未消秋麥未能及時耕種恐交春米價漸昂況蘇
松戶口繁多民間食米多取給於外販尤當早為留意
查江安糧道有存貯還漕一項計二萬八千餘石安廬
鳳淮四府各項共計九萬餘石應差京官一員前往確

查分別留運平糶以濟民食但地廣人稠此數未必敷
必設法多貯方覺寬裕著九卿速議具奏因議定令
該督撫動帑委員赴產米地方採買再照河工議
叙貢監之例將銀兩改為本色輸納分別府州縣
之大小酌量應輸米穀之多寡捐足停止所收米
穀應用平糶散賑之處該督撫具題動支

又令杭州建倉以浙商輸銀買米存貯照兩淮鹽
義倉之例隨時平糶

五年以清查江西倉穀暫停糶三之例時

命署巡撫邁柱清查江西倉糧奉

諭旨聞江西倉儲虧空甚多向來倉穀舊例存七糶三原為青黃不接之時用以接濟民食今裴率度因各州縣虧空竟借此為那補遮掩之計若仍聽其存糶則盤查難於清楚著從雍正五年將糶三之例暫行停止俟各州縣倉穀查清之後奏聞再行

又令兩淮近竈之地建倉積穀煎鹽竈戶皆居住

濱海之地離城最遠每遇歉收之歲覓食維艱若
遠赴鹽義倉運致米石重勞往返奉

諭旨酌立數倉於近竈之地積貯米穀以備貧苦竈戶一
時緩急之用

又令湖廣買貯穀石并開事例以裕積貯湖北湖
南現存常平倉穀麥及截留漕米統計止五十餘
萬石視他省積貯較少議照江浙二省現開捐納
貢監事例飭各府收捐本色實貯在倉以備東南

各省撥運平糶之需

又撥浙江穀石運往福建協濟先是二月以福建米價昂貴從督臣高其倬之請撥江蘇米十萬石運往至是浙江巡撫李衛請於溫台二府屬撥運穀七萬石仍令各屬動銀買補閩省解償還項其截留浙江漕米十萬石易穀二十萬石由海運赴閩亦將截留糶價分撥各屬於秋成買穀還倉又增定浙江常平倉捐穀數目先是浙江常平倉

捐數止議七十萬石業經捐足撫臣李衛以浙省人民衆多各縣存穀無幾兼以接壤閩省常需海運請於前定捐數外加倍捐至一百四十萬石按大中小縣分別存貯從之

又令浙江省採買川米先是四年浙江巡撫李衛請動浙庫公項銀十萬兩委員赴川採買米石以備浙閩兩省緩急得

旨允行至是川米運回正值杭嘉湖價昂之候隨令平糶

復允李衛請將糴米歸款銀借動五萬兩并各商
公項銀三萬兩再委員往川採買亦俟運到分款
存貯

又定常平倉盤查事例議定各省常平倉每年春
間出借秋後徵還務於十月內全完造冊送部歲
底令知府直隸州盤查逾限不完或捏造俱行叅
處仍照數追賠如有影射作弊冒借入己者紳衿
黥革牙蠹拿究所欠穀石加倍追還鄉保有無受

贓分別治罪再倉穀出糶之時奸商勢豪串通捏名零星糶出囤積射利者地方官嚴禁之州縣以糶借為名掩飾虧空者分別侵那定罪其盤查之道府州并該管之督撫隱匿徇庇照例處分仍將所虧倉穀著落分賠

又清查湖廣社倉虧空署湖廣總督福敏叅奏虧空社倉各員請分別議處得

旨社倉之設所以預積貯而備緩急朕御極以來令各省

舉行曾屢頒訓諭務俾民間踴躍樂輸量力儲蓄不可
繩以官法誠以官法相繩則勉強催迫轉滋煩擾惟期
設法開導使衆樂從不知一毫擾累乃為盡善也數年
之內各省督撫奉行最力者惟湖廣總督楊宗仁今據
福敏陸續盤查具奏前來始至原報甚多而現存無幾
此中情弊想因不肖有司侵蝕入己或那移以掩其虧
空又或楊宗仁銳於舉行而各官迎合其意虛報穀數
以少為多均未可定總之舉行社倉之法其中實有甚

難者我

聖祖仁皇帝深知其難是以李光地奏請而未允張伯行暫行而即罷此實事勢使然也以民間積貯言之在富饒之家自有蓄積雖遇歉收而無藉乎倉穀則當輸納之時往往退縮不前至貧乏之家仰給社倉固為殷切而每歲所收僅供生計又無餘粟可納以備緩急此責諸民者之難也至於州縣官實心視百姓為一體者豈可多得今以常平之穀為國家之公儲關係已身之考

成尚且侵欺那用虧空纍纍況民間之社倉安能望其盡心經理使之實貯以濟用乎朕之舉行社倉實因民生起見又諸臣條奏多言之鑿鑿是以令各省酌量試行以觀其成效何如並非責令一概施行也湖廣社倉虧缺之數即交與福敏悉心清查倘穀已如數交倉而州縣侵蝕那移忍以百姓預備之需充一己之私用者著即於原侵那之州縣名下嚴追賠補或民間原未交倉或交倉之數與原報之數多寡不符者若必欲令民

間照數完納恐小民力有未敷未免竭蹶非朕曲體民
隱之意福敏辦理此事必須至公至當方與吏治民生
兩有裨益也自古有治人無治法必有忠信樂善之良
民方可以主社倉之出入必有清廉愛民之良吏方可
以任社倉之稽查各省官民果能實力奉行而善全無
弊朕實嘉之至於繩以官法而好尚虛名則有司奉行
之不善負朕本意矣

又

諭內閣常平倉穀乃民命所關數年以來朕為此事宵旰
焦勞諄諄誥誡若地方大小官員苟有人心斷不忍置
之膜外查福建通省應貯米穀共一百七十八萬石為
數可謂足矣乃上年稍覺歉收米價略長而地方大小
官員與兵民之心皇皇以缺米為慮彼時朕即疑閩省
積貯之數必有虧空故地方情形若此也近聞閩省各
屬倉穀錢糧虛懸者甚多有銀穀兩空者有無穀而僅
存價值者至於實貯在倉者則十無三四向來直隸江

西二省倉儲不實經朕特遣大臣前往逐一清查並遴選人員命往將虧空之州縣官即行更換是以二省倉穀漸次清楚今閩省積弊若此亦當特遣大臣會同新任巡撫常賚將通省倉穀秉公據實一一清查如有查出虧空之州縣並失察之知府等官即將伊等解任審追務期徹底澄清不使絲毫朦混以副朕察吏惠民之至意

又奉

諭旨福建通省倉穀虧空甚多朕特遣大臣等前往盤查但恐不肖有司等聞欽差將至向紳衿富戶那移借貸以掩飾其虧空之項而紳衿富戶等或畏其威勢或迫於情面不得已代為應付以圖掩飾彌縫於一時均未可定朕此番之差遣大臣清查斷不容有絲毫之朦混隱匿倘將貲財穀米借出便為官物斷斷不能退還用是明白曉諭俾勿墮貪官劣員之術中使地方積弊永除而後任官員亦共知儆戒不致仍蹈前轍著將此通

行福建郡縣鄉村咸使聞知

又

命設米穀倉六所於江南泰州如臯鹽城海州板浦
附近商竈地方以備賑濟

又議定山東社倉事例先是巡撫塞楞額言濟南
新建社倉請交與鹽法道經管奉

諭旨以社倉之設應聽民間自便若以官法繩之必致滋
擾著另議具奏尋塞楞額議新建社倉交與歷城縣管

理令該縣勸諭紳衿士庶量力捐輸臣仍率同司道各官每於秋後量力倡捐無論米穀豆黍隨便糴買新建社倉一百二十間儘可收貯米穀之出入在民捐者令歷城縣收發稽查在官捐者委之濟南府下戶部議尋議社倉之設原以鄉居之民離城寫遠不能仰給常平之粟是以於鄉村建立社倉以民間之蓄積濟民間之緩急出入收納聽民自便是社倉所以補常平倉之不及也今於濟

南府省會之地建立倉廩將民捐米穀委官收發
經管是常平而非社倉矣應令該撫飭令府縣官
勸諭紳衿士庶量力捐輸於該地方鄉官士人內
擇公正殷實之人二名立為正副社長俾其經理
該縣不時稽查如該社長出納有法照例分別獎
勵倘有漁利侵那情弊即行黜革治罪至各官所
捐米穀應如該撫所奏令濟南府收發稽查飭該
府加意經理倘有不肖有司將官捐米石那移侵

蝕即指名揭叅治罪所建倉廩一百二十間令該撫酌量
應用分為二所以民捐者為社倉官捐者為常平倉從之
六年奉

諭旨聞兵丁等於京通二倉支領米石時每因腳價之費
賣米充用致有不計其米之接續輒以賤價糶及至缺
乏又以貴價糶此甚無益於兵丁者也現今旗下俱有
官房或按八旗設立八局或按滿洲蒙古漢軍旗分設
立二十四局將兵丁欲賣之米以時價買貯及其欲買

則以平價賣給如此似於兵丁大有裨益著管理王大臣等公同詳議尋議八旗按滿洲蒙古漢軍旗分設立二十四局通州按左右二翼設立二局京師每局給銀五千兩通州每局給銀八千兩其八旗之二十四局於各旗官房內揀用本旗若無官房就近揀用其通州米局於倉附近處擇內務府官房二所應用八旗米局每局選賢能官二員領催四名令其辦理通州二局每翼委官四員領催八名辦

理各局應用寫算之人於兵丁內派委量米之人
於旗人內僱用通州每翼挨旗各承查一年設立
米局以後禁止在他處私行糶賣每旗各派叅領
一員令其稽查違禁治罪或被旁人拿獲將稽查
之叅領及都統等一併議處其管米局之官員等
如有作弊侵漁之處令該管大臣等嚴查治罪若
果生息有方於應陞處列名或該旗大臣等怠玩
不以為事致有虧折者將所折銀兩著落派出之

員賠補有不能完納者著該管大臣賠補俟至一年將用過銀兩及所得利銀數目算明具奏得

旨如議行

又截留浙江漕糧運赴閩省平糶

七年定閩省採運米石之例閩省臺屬各縣倉儲向例每年撥粟十萬石碾米五萬石運往泉漳二府平糶至是總督高其倬言臺屬粟石止可存備全臺并廈門金門等處兵糧請將官莊現存粟四

萬九千餘石價銀七萬三千四百餘兩內抽撥採買運到泉漳二府永為定例從之

又定潮州城守各營貯穀之法議定廣東潮州城守三營買穀三千石分貯於青黃不接之時借給俟散餉時照數扣除概免加息令各營將備經管倘有侵那缺少照正項錢糧例追賠治罪

又頒發社倉

諭旨令陝西督撫勒石宣布先是陝西總督岳鍾琪遵

旨設立社倉於雍正四五兩年耗羨銀內撥發各州縣十
四萬五千八百餘石採買穀麥每社一千石蓋倉
收貯以資借放令署督查郎阿巡撫武格按鄉分
社公舉倉正倉副經管至是岳鍾琪言陝西大僚
皆不知臣原奉

恩諭之由每遇州縣請領社倉銀兩過於慎重戒諭甚嚴
州縣亦懷貽累之憂又畏積貯虧空嚴例處分將
所領銀兩不肯交與倉正倉副仍勒令里甲押運

又有令胥役家人幕客收放者始而勒買繼而勒借陝省百姓竟呼此項穀麥為皇糧其所以然者祇以因民所利之

明詔未頒是以在官在民之界限不定伏祈特頒社倉諭旨交督撫恭錄鐫石每一倉頒發一本張掛曉諭臣又謹擬社倉條約十六事亦請發各社倉使鄉愚共曉則每年收放皆有程式庶可久而弗替

上可其奏

特諭曰朕惟國家建立社倉原令民間自行積貯以百姓之資糧濟百姓之緩急其春貸秋償及滋生義息各社自為經管登記地方有司但有稽查之責不得侵其出納之權此社倉之古法也是以各省有請立社倉者朕皆令其聽從民便無得強勒捐輸繩以官法以致便民之舉轉為民累所以曉諭各省督撫者不啻至再至三矣從前岳鍾琪在京時請於通省加二火耗內應行裁減每兩五分之數且暫行徵收發與民間採買穀石分

貯社倉俟採買數足即行裁減是以暫收耗羨之中隱寓勸輸之法實則應行酌減之耗羨即小民切己之貲財而代民買貯之倉糧即小民自捐之積貯此藏富於民之良法最為切實而易行是以俞允所請令其辦理乃陝省官員不知此項穀石本係民貲又未識從前岳鍾琪奏請之由以為收貯在官即是公物不肯付民經管而胥吏司其出納者遂有勒買勒借之弊殊非數年以來朕之周資詳畫多方生養斯民本意矣今特降諭

旨將朕允從岳鍾琪之請并岳鍾琪陳奏原委明白曉示著署督查郎阿巡撫武格刊石頒布俾各州縣鄉社小民咸知朝廷經管設法之蓋藏實百姓自為斂散之資用倘地方官有於社倉穀石創議交官不交百姓或指稱原係公項預為公事侵那之地者俱以擾撓國政貽悞民生論從重治罪其岳鍾琪所擬社倉條約著戶部抄錄交與該督撫分發各州縣刊刻木榜於各鄉社倉豎立以為永久程式

又以右翼四旗通州米局生息定三年查核例署
正黃旗都統覺羅伊里布等言右翼四旗通州米
局領戶部銀八千兩斟酌足用自雍正六年三月
起至本年三月共生息銀四百餘兩請將此銀仍
留在右翼通州米局內買米生息得

旨米局之事著三年查奏一次

又奉

諭旨常平積貯必須倉廩堅固始可為經久之計聞各省

中偏僻之邑竟有向來本無倉廩或寄頓寺廟或借放紳士富戶之家而霉爛虧折生事滋擾之弊多由此起大非朕慎重民儲之意凡各省未有倉廩之州縣著該督撫即行建造

又申明社倉借給貧民穀石之例從監察御史晏斯盛請也凡遇荒歉貧民借領倉穀者每石止收息穀十升遇小歉免取其息仍如本數還倉

諭奉天有司勸諭百姓積貯將軍多索禮奏報奉天秋成

大稔奉

諭旨奉天地氣乾燥不比南方潮濕之區正當乘此豐收之時以為儲蓄之計著該地方通行曉諭勸導若有穀之家果能留心積貯至於穀多價賤難於出糶者著即奏聞朕當發官價糶買或從海道運至京師俾積穀之家實獲利益必不使有穀賤傷農之歎也

又令安西地方動支官銀糶買盈餘穀石署川陝總督查郎阿言招往安西沙州等處屯墾民戶所

種小麥青稞粟穀糜子等項計下種一斗收至一石三四斗不等其餘各色種植亦皆豐厚臣恐口內奸販囤戶聞糧多價賤興販射利已令總兵道員嚴行查禁並傳諭民戶按一年所需扣存外其餘即在本處糶賣以濟兵丁商民口食得

旨民戶盈餘之穀原期糶價以為日用之資若本地糶穀者少則出糶未免艱難不可不為計及著該地方官酌量本地情形不必相強若有將盈餘之穀情願出糶者

著動支官銀照時價糴買存貯公所明年倘有需用聽
辦理軍餉之大臣及該督撫行文支撥安西現有備用
銀即可動用採買再於西安藩庫撥補還項此朕體恤
民戶俾糴穀得價用度豐裕之至意著地方官善於奉
行不可勒令糴賣生事滋擾

又增定浙江購米分貯之數浙江總督李衛言足
食所以養民有備始能無患近因部臣勵廷儀奏
請將米多倉少之處糴出餘銀批發倉多米少之

州縣一例買穀存倉此亦酌盈劑虛之善策但止就倉廩之多少以為米穀之去留設遇人口繁多產米稀少又係水陸適中轉輸便易之州縣而因其倉少遂將倉外餘米盡行發糶則有不足之虞若地處偏僻需米無多以倉有空間必欲購買貯足亦恐徒滋紅朽臣愚以為倉多倉少之處止可計米以定廩未可就廩以定米也即如浙省溫處各屬舊存穀石有一二萬三四萬不等嘉湖寧紹

等處少者四五千多亦不過七八千惟省城旗營駐防更為緊要永濟倉捐納補漕案內應購米四十四萬餘石除分貯金衢嚴三府及備借兵米外餘悉貯本倉今酌定應貯穀四十萬石抵米二十萬石其餘共應買穀四十八萬餘石於通省中按縣分大小水陸衝僻或僅為本地之儲積或可備鄰境之轉輸酌定數目除原存外少者添撥每年存七糶三秋成補還則存倉之成色必高而積久

之折耗可減於貯備似為有益事下所司議行

議定山東貯穀額數議准山東各府並附郭首縣
貯穀二萬石大州萬八千石中州大縣萬六千石
中縣萬四千石小縣萬二千石大衛萬石中衛五
千石小衛二千五百石大所三千石以此定額其
地要民稠或積窪易潦者酌加二三千石如有闕
額動帑買補

八年准准商領運湖南倉穀仍令商人即於湖南

需米處糶賣先是六年湖南布政使趙成言湖南現貯倉穀六十餘萬石之多又有收捐穀石本省可云有備但地勢卑濕請分撥別省令來楚運往以免霉變下戶部議應行文江浙督撫令其詳酌如有應需穀石之處即委員轉運得

旨俞允兩淮巡鹽御史噶爾泰言據兩淮商人黃光德等具呈情愿出資將湖南積穀三十餘萬石照依原買之價交納湖南藩庫領運隨地隨時售賣仍將

所售價銀交納運庫從之至是湖南總督邁柱言
今年湖南岳常二府微欠雨澤正在動用公項銀
一萬兩買米備糶而貯倉之現穀與其照原價以
給商不若留俟來年春夏照原價平糶以濟本地
之民似應飭商暫停領賣俟明年無需用之處仍
聽該商領運奉

諭旨向因湖南撫藩皆言地方積穀甚多難以久貯奏請
分撥別省以免霉變是以兩淮商人有赴楚領運効力

急公之請今商人既已交價而邁柱又稱楚南需米請飭商暫停領賣是湖廣督撫藩司前後自相矛盾也湖南現貯穀六十餘萬石之多欲分撥別省以免霉變則本省府縣有需米之處正可將此奏聞平糶以濟民食而邁柱乃云正在動用公項銀一萬兩買米備糶是邁柱之奏又自相矛盾也且邁柱又稱此時飭商停運俟楚省不需米穀之時仍聽該商領運是米貴之時則令商人停運而米賤之時則令商人領賣亦甚非情理之

平查從前噶爾泰代衆商具奏原有隨時隨地售賣之語今江浙俱獲豐收米價甚賤湖南既有需米之州縣著該商仍照前議領米即於湖南需米之處照時價糶賣不許地方官抑勒商人亦不許商人高擡價值倘商人獲有餘利聽其自取不許交官如此則淮商領米得以貿易而楚省積穀仍得流通於商民均有裨益湖廣督撫等即遵諭行

又令奉天近海州縣運米二十萬石至山東平糶

又令東省竈穀交附近倉廩存貯東省十場二縣
存貯竈穀八千三百石零舊無倉廩收貯又從無
動用之處至是議令歸併附近倉廩存貯其有相
隔州縣稍遠者於明春青黃不接時減價糶賣所
賣銀兩俟秋成後照數買交附近州縣倉廩收貯
遇有應行賑恤之處同民戶一體賑恤

又

諭戶部今年江南河東等省間有被水州縣已降旨發粟

蠲租加意撫恤猶恐明春青黃不接之時不無借資鄰省湖南湖北二省向來積穀甚多今年又復豐收穀價大減民間出糶維艱朕特思酌盈劑虛之道著將從前商捐及耗羨銀存貯藩庫者動支五萬兩遴員分往所屬豐收價平之處糶買新穀暫行收貯俟鄰省需米平糶即令委員來楚照原價先儘倉貯之穀交買運回以濟民食仍將新穀補倉價銀還項如此則鄰省無貴糶之虞而楚省又得出陳之益事屬兩便

又添設五城通州米廠內閣奉

諭今年直隸近河地方雖有被水一二處其餘州縣俱各十分收穫何以米價昂貴著大學士詢問九卿並將如何使米石價平之處詳議具奏尋議目今米價較春間俱屬浮貴五城各廠買米人多每至擁擠請於每城暨通州各添一廠將成色米石廣為減糶至城內八旗及通州左右兩翼米局係收買之好米請照春間市價量加五六分如從前價值稍浮照現

議價值發賣並行令步軍統領順天府嚴查窩囤之弊其各處賣米之錢請照戶部從前所奏於每月兵餉內量加支放俾錢米價俱疏通至於成色米石價值既賤尤便民間應隨時發糶不必拘定米數俟價平應停之時戶部再行奏聞從之

九年以山東水患發米二十萬石平糶

又發倉米五萬石於五城平糶禁八旗米局糶賣增價從大學士馬爾賽等議也

又撥運浙江米穀至淮北山東平糶先是八年夏秋之交淮北山東接壤州縣被水至是以浙省永濟鹽義二倉及附近水次州縣穀石運至該處平糶從浙江總督李衛請也

又撥天津奉天等處粟米并截留江西湖廣漕米至山東分貯東省被水州縣賑濟所用之穀令於通省現存新收粟米撥十五萬石再簡科道官二人動支帑銀往天津等處率地方官買粟五萬石

運至山東令於德州常豐臨清等倉收貯再於奉
天撥粟二十萬石由海運至天津再僱民船運至
德州交與山東地方官運送其東昌以下之近水
州縣將江西湖廣漕運截留三十萬石令該撫分
撥存貯

又令直隸各屬發存倉米穀平糶上年直屬夏秋
間有被水州縣業經議准無論成災不成災俱發
存倉米穀減價平糶米價漸平而未被水各州縣

尚不無米貴之處至是復令將各屬存倉米穀多者糶三留七少者糶五留五有更少者則於鄰邑酌撥以均平糶

又定湖南常平倉採買盤查處分湖南各屬常平倉雍正五年存七糶三者三十八州縣盡數減糶者二十五州縣歲終冊報買補者僅有其半并無府結到司巡撫王國棟言嗣後請將平糶價銀解府州貯庫秋間具領買補倘遇穀賤領價贏餘令

其盡數買貯若秋歉穀貴買補之價浮於減糶之
價州縣不能賠墊亦令報明具題酌給現今委員
遞盤如果顆粒無虧具結詳報倘有缺少虧那或
折價抵穀及將行戶領狀混行掩飾者立即揭叅
仍令解任賠補至該管道府亦定限於十月內盤
明加結詳司年終據實總冊彙送逾十月不行詳
揭者即照徇庇例叅處分賠疏下戶部議行

又令江蘇各屬增貯倉糧江蘇所屬十三府州地

廣人稠需用米穀甚多而備貯倉糧視浙江河東等省獨少至是議令照雍正五年所定數大縣一萬五千石中縣一萬石小縣八千石穀則倍之凡遇青黃不接之際酌量糶賣不必拘定存七糶三仍令秋成領買還倉至江蘇常鎮四府戶口尤多令於水路衝要之地另建府倉各貯五萬石以備轉運

又以川省積貯數少議增貯至百萬石先是四川

總督黃廷桂等言川省存貯米穀通計止四十二萬石請將川省常平倉捐例改穀作銀隨時糴買并酌開事例買穀存貯得

古川省乃產米之鄉積貯易於為力該督撫請開捐納誤矣況改穀折銀又復將銀買米徒滋弊端但通省積穀止四十萬石為數實少應如何增貯著大學士等詳議於是議除現存米穀外再買貯六十萬石有百萬之蓄度足備用請分作三年約計每年買穀二十

萬石每石約價三錢需銀六萬兩於夔關及鹽茶
贏餘銀內動支至各府州縣應分貯若干等事宜
令該督撫分別詳定得

旨依議速行但每年穀價貴賤不等如畫定三錢恐價貴
時或至抑勒強買價賤時不免侵漁冒銷著再議尋議
如遇價賤不及三錢即可過於二十萬石之數或
價值甚賤應量加銀兩及時採買倘不止三錢亦
可不及二十萬石之數或價值甚貴應停止採買

以待來歲秋成總於三年內通融籌畫買足六十萬石之數從之

又議定廣東瓊州等鎮協積貯之數以廣東瓊州鎮瓊協龍門協香山協虎門協廣海寨僻處海外應預籌積貯議定買穀一萬六百石分貯各鎮協營遇青黃不接之時借給兵丁秋收照數買補槩免加息

十年令甘涼肅三州改捐米石以備積貯大學士

鄂爾泰等言甘涼肅為軍需彙齊之地倉儲緊要
請將現行捐納款項改折本色糧石得

旨依議邊地改折米石於軍需誠為有益但在本地採買
恐價值騰貴轉於軍民未便除甘涼肅本地民人准即
以所有糧石交納外其他處捐納人等俱應在別處運
交不得於甘涼肅採買著署督劉於義等通飭曉諭并
稽查禁止

又定江蘇崇明縣倉積貯崇明孤懸海外地不產米

議准於積貯項內撥米一萬石收貯縣倉

十一年飭川省開米禁先是雍正九年巡撫憲德以川省米價稍昂又復碾辦軍糈奏請暫禁商販至十年川省收成豐稔米價平減仍照前禁止未開至是奉

特旨申飭令憲德速弛其禁毋蹈遏糴之戒

又奉

諭旨前據顧琮等奏請順天天津等七府五州酌量領運

北倉米石以備平糶并將所存倉穀存七糶三以濟民食朕已允行今思目下正當青黃不接之時糧價漸昂各處皆有常平倉穀其存貯萬石以外者准存七糶三萬石以內者於糶三之外酌量加增存貯甚少者或添運北倉漕米或撥領鄰近倉儲務令各處米價得平小民易於糶買

又令浙江動支公項於湖廣等省採買米穀先是十年浙省秋成歉薄倉穀不敷接濟議令動支鹽

庫銀五萬兩委員分往產米地方採買以資平糶
至是總督程元章以杭城五方雜處撥濟仍艱再
請動鹽費備公銀五萬兩照例增置從之復議定
每年令該督酌定米數於秋收時動項赴湖廣等
省採買分貯省城永濟倉及杭嘉湖所屬州縣以
備歉歲平糶之用

又令福建分地採買并將臺灣社穀撥運分貯閩
省地處山海田產無多雍正五年截留浙漕十萬

石併採買米穀共二萬九千餘石節次糶賣存價
六萬餘兩至是總督郝玉麟請分地採買以廣倉
儲尋議定以一萬兩於楚省買運并將臺灣鳳山
縣八社積穀酌撥十萬石赴福興漳泉四府分貯
來歲將平糶銀發交臺屬秋成採買還倉

又令直隸喜峰口建倉存貯穀石議定喜峰口為
蒙古往來之路糧石不可不備令於永平府屬量
撥穀八千石運送喜峰口建倉存貯添設巡檢一

員以專責成

又令直隸各屬添建倉廩撥穀分貯順天等十府
冀趙等五州現存各項并應買還本色共穀二百
一十五萬餘石酌量大中小治勻撥備貯仍令動
項添建倉廩

又議定江蘇各屬添貯倉穀六十餘萬石動用司
庫酌留并捐項銀三十餘萬兩購買存貯

又定廣東買補倉穀之例議准廣東每年糶三倉

穀自九月以後數在四千石以下者定限兩月內
買補足數四千石以上者三月內買補足數九月
以前有能先買者聽便

又奉

諭旨各省州縣設立社倉原以便民濟用聞直隸百姓借
領社穀必待督臣咨請部示而後准行往返動經數月
小民守候維艱仍不免重利告貸之苦著該督李衛變
通辦理咨報存案嗣後遵照施行

又令貴州古州都江建倉積貯時黔省新闢苗疆
安設重鎮議令於廣西潯州沿河等倉撥穀五萬
石分運古州都江古州建倉六十間貯穀三萬石
都江建倉四十間貯穀二萬石以資平糶

又設四川潘州等營倉並定貯米之數四川潘州
達建寺二處新設官兵議於潘州協標貯米三千
石達建寺營貯米五百石交營員收管以資兵丁
借支平糶之用又議令新設苗疆河西七兒堡建

造倉廩貯米二千石交與該同知會同營員收管
十二年令福建廈門買貯穀石福建水師提
督王郡言廈門一島地少人多兵民食米應為籌
畫查提督衙門有營房魚池等租銀每年可得五
百餘兩請買貯穀石從之

又以江蘇地方雨水稍多

命將乙卯年漕糧於被水州縣截留平糶

十三年准陝西買麥豆備貯陝西巡撫史貽直言

陝西倉穀雖統計百餘萬石數年以來運濟軍需已動過西鳳數府州穀六十七萬石現在存貯有限是以節次動項採買貯穀三十四萬二千餘石尚少穀二十餘萬石應俟秋成買補但穀價之低昂難以預料況從前未還及今春借糶之穀均須秋後還倉為數既多一時未易採買現今麥價平賤應乘時動支五萬石價銀買麥存貯俟明春出借仍照一麥二穀之例易穀還倉再陝西豌豆連

歲薄收而軍需孔亟貴買則糜費國帑核減則苦累小民不若及時買備庶為善策今歲豌豆豐登價值平減亦應動支五萬石價銀買豆貯倉以備撥濟從之

又議行平糶倉穀三事內閣學士方苞條奏一倉穀每年存七糶三設遇穀價昂貴必待申詳定價示期窮民一時不得邀惠請令各州縣酌定官價一面開糶一面詳報俾民均沾實惠一江淮以南

地氣卑濕若通行存七糶三恐積至數年必有數百萬霉爛之穀有司懼罪往往以既壞之穀抑派鄉戶強授富民請飭南省各督撫驗察存倉穀色因地分年酌定存糶分數其河北五省倘遇歲歉亦不拘三七之例隨時定數發糶秋收如數買補一穀之存倉則有鼠耗盤量則有折減移動則有腳價糶糶守局則有人工食用春糶之價即稍有贏餘亦僅足充諸費請飭監司郡守歲終稽查但

穀數不虧不得借端要挾倘逢秋糴價賤除諸費外果有贏餘詳明上司別貯一倉以備歉歲賑濟之用俱從之

入令直隸買麥收貯時直隸二麥豐收准於司庫存公銀內給清河道二萬兩天津道萬兩大名道三萬兩霸昌道萬兩河間府二萬兩分發各屬於麥多價平之州縣盡數採買收存本倉每年易穀積貯

又酌定奉天州縣米石採買糶賣之例所存黑豆亦如之以錦縣寧遠州戶口殷繁且係沿海地方每可接濟鄰省議令各貯米十萬石蓋平復州海城等處濱海潮濕難以久貯各存米四萬石金州現存米六千餘石無庸議增其不沿海之承德鐵嶺開原三縣各存米四萬石遼陽州廣寧縣各存米五萬石亦無庸多貯以滋潮浥永吉州現存倉穀一萬石仍令照舊收貯義州新設每年徵收地

米陸續蓋倉俟有成數再議存留長寧縣雖地僻
民稀未便並無積貯酌令建倉貯穀五千石以上
凡現存米石不足議存之數飭令買補易換一并
貯倉有逾額者悉行糶賣將價銀解部充餉至黑
豆一項供應驛站外所需無多除向無貯豆之永
吉長寧復州寧海無庸議外餘錦寧等九州縣量
為存留三千石二千石不等盈餘不足者亦照米
石例辦理

又定雲南社倉之法雲南設立社倉通計一省所捐穀麥七萬餘石其中千石以上者僅二十餘處此外皆數百石數十石亦有全無社穀者至是議准雲南各屬皆有常平倉及官莊等穀存貯尚多可酌量暫撥以作社本將社倉存貯未及千石者按地方之大小計存貯之多寡於該處常平官莊等穀內動撥五百石或八百石作為社本令社長一併經管出借窮民秋成加一還倉小歛免其取

息歸於社倉項下積貯俟積有千石仍將原動常
平等穀歸還原款

皇朝文獻通考卷三十五